

Date – 05/12/2025

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Chief Minister Pu Lalduhoma'n Mizo hnam zingah Hmar hnam chu a lian ber pawl an nih avangin U chan chang thiam a, Zofate inpumkhatna ngai pawimawh turin a chah.
2. RD Minister Prof Lalnilawma'n MGNREGS hnuaiia inhlawhna hlawh thla 4 chhung la dawn loh chungchangah State sorkar chuan thiam lohna a neilo tih a sawi.
3. Sawrkar laipui hmalakna Pradhan Mantri Ujjwala Yojana (PMUY) hnuaiiah Mizorama chhungkaw khawsak harsa hmeichhiate hnenah a thlawna Gas connection 36031 pekchhuah a ni tawh.
4. India leh Russia chuan vawiin khan thawhdunna tur inremna thuthlung pawimawh tak tak an ziak.

<><><>

SIKPUI RUOI 2025

Chief Minister Pu Lalduhoma'n Mizo hnam zingah Hmar hnam chu a lian ber pawl an nih avangin U chan chang thiam a, Zofate inpumkhatna ngai pawimawh turin a chah.

He thu hi vawiina Hmar Students' Association General Assembly Vawi 60-na, SIKPUI RUOI 2025 Saipum khuaa neih a hmanpuinaah sawiin, Chief Minister Pu Lalduhoma chuan zirlaite chu nakin lawka ram enkawltu turte an ni tih sawiin ram leh hnam tha zawk nei turin an pawimawh hle a ti a, ramin a neih ropui ber chu a mihring chengte an nih avangin kal khawmte chu ram hmasawna tura mawhphurtute an ni, a ti.

Chief Minister chuan, sawrkar hnathawh tum zirlaite dinhmun tih hmasawn nan theihtawpin sawrkarin ke a pen a ti a, mahni kea din tumte chu an bana kaia khai chhuak turin Bana kaih scheme an chhawp chhuak tih sawiin kuthnathawh lama thawkte leh thawh tumte thlai thar leisakin, mi tin tan remchanna an siamsak tih a sawi.

Pu Lalduhoma chuan, ruihhlo laka himna awlsam ber chu tih chhin ve loh a ni tih sawiin, zirlai kal khawmte chu ruihhlo laka fihlim turin a chah a. Zofate inpumkhatna ngai pawimawh a, inpumkhatna fatu-ah tang zel turin kalkhawmte a chah bawk a ni.

He hunah hian Mizoram Assembly Speaker Pu Lalbiakzama chu Khualzahawm a niin; IP&R Minister Pu B. Lalchhanzova'n a tawiawm bawk a ni.

<><><>

DGP PRESS CONFERENCE

Director General of Police Pu Sharad Agarwal chuan hunpui lo thleng turah mipuiten ralmuang taka hun an hman theih nan khauh zawkin venhimna kenkawh a ni dawn a ti a, zana khawpui chhung leh district hrang hrangah Police an vak kual thin dawn tih a sawi.

DGP Pu Sharad Agarwal chuan kumin July ni 30 atanga office a luah hnuah a vawikhatna atan vawiin khan thuthar thehdarhtute chu DGP conference hall, Police Headquarters (PHQ), Khatla, Aizawl-ah a kawm a, Mizoram venhimna kawnga kumin chhunga Police hmalakna hrang hrang sawiin an hmalakna zingah ramri chhehvelah khawtlang hruaitu leh tlawmngai pawl te nen thawk hovin Police te chuan ngawrh takin ruihhlo tawlhruk tur an veng a ti a, hei bakah hian Inner Line Permit (ILP) pek chhuah chungchangah Police chuan khauh takin hma an la mek tih sawiin, hunpui lo thleng turah pawh mipuiten ralmuang taka hun an hman theih nan khauh zawkin venhimna kenkawh a ni dawn a ti a, zana khawpui chhung leh district hrang hrangah Police an kal kual thin dawn tih sawiin, thuthar thehdarhtute chu thawhho puiah a sawm a, dan kalha thil thleng chungchang an hriatte chu Police te hnenah thlen hreh lo turin a chah a ni.

Byte: Mizoram DGP Pu Sharad Agarwal

Mizoram DGP Pu Sharad Agarwal, IPS hi kum 1973 khan Uttar Pradesh ah piangin, IIT Delhi atangin B. Tech in Civil Engineering leh M. Tech in Water Resources Engineering a zir chhuak a, kum 1997 khan AGMUT cadre ah IPS-ah tlingin, ram chhung hmun hrang hrangah post a nih hnuah kumin July ni 30 khan Mizoram DGP hna a thawk tan a, hna a thawh that avangin chawimawina hrang hrang, President Police Medal for Meritorious Service on Independence Day, President Police Medal for Distinguished Service on Republic Day, leh Hard Area Medal te a lo dawng tawh a ni.

<><><>

RD MINISTER

RD Minister Prof Lalnilawma'n MGNREGS hnuahia inhlawhna hlawh thla 4 chhung la dawn loh chungchangah State sorkar chuan thiam lohna a neilo tih a sawi.

Vawiin khan RD & LA department Minister Prof Lalnilawma chuan Thingdawl RD Block kum 50 a tlin lawmna hmanpui in, BDO Office building thar a hawng a, he hunah hian Minister chuan ni 100 inhlawhna thla 4 chhung dawn loh chungchangah State sorkar chuan thiam lohna a neilo tih sawiin sawrkar chuan a tihtur ang zel a tih thu a sawi a, December ni 2 khan Sanction order tichhuakin, State dawng hmasa bik an awm lo a ti a, Mizoram chu Central-in a hrek biklo tih sawiin sanction order an hmu tawh a ti a, nakin lawkah Finance Department-in an tihfel hunah mimal Account-ah lut thei dawn a ti bawk.

Minister chuan Thingdawl RD Block in kum 50-na (Golden Jubilee) a thleng thei chu a lawmawm atih thu sawiin RD Block rinchanin mipuiten hmasawmna tam

tak anlo hmuh tawh bakah Huan leh thlai tha tak te an neih phah tawh a ni a ti a. MzSLRM hnuaiia Self Help Group ten an thil siam chhuah leh thar chhuah tura hmalak mek niin, a hming atan 'Sêl-hêl' tih hmang turin Registration tih mek a ni, a ti bawk.

<><><>

PMUY

Sawrkar laipui hmalakna Pradhan Mantri Ujjwala Yojana (PMUY) hnuaiiah Mizorama chhungkaw khawsak harsa hmeichhiate hnenah a thlawna Gas connection 36031 pekchhuah a ni tawh.

PMUY hmalakna puang zarin vawiin khan FCS&CA Secretary Pi Teresy Vanlalhruii leh IOC DGM Z.Hlungdim bakah hotu dangten thuthar thehdarhtute kawmin PMUY Scheme chu sawrkar laipuiin kum 2016 May thla khan bulṭanin ramchhunga chhungkaw khawsak harsa hmeichhiate hnenah a thlawnin Gas connection pekchhuah thin a ni an ti aa, PMUY beihpui thlakna ramchhungah Gas connection vaibelchhe 10.33 pekchhuah tawh niin Sawrkar laipui chuan tunhnaiah connection nuai 25 a pe chhuak leh dawn tih sawiin heng pekchhuah thar zingah Mizoram atanga a tam thei ang ber an tel theih nan a rang lama inziah luh vat a pawimawh thu an sawi a ni.

Byte : FCS&CA Secretary Pi Teresy Vanlalhruii

PMUY hi Mizoramah connection 36031 pekchhuah tawh a ni a, heng zingah hian Mamit District ah tam berin connection 7462 pekchhuah a ni tawh a, Aizawl in dawtin 6818 connection pek a ni a, Lunglei ah 4358 leh Kolasib ah 4524 pekchhuah niin Lawngtlai District ah connection 3850 pekchhuah a ni a, Champhai ah 2187 pekchhuah niin Serchhip ah 1891 leh Hnahthial ah 1825 pekchhuah a ni a, Saitual ah 1225 pekchhuah niin Khawzawl ah connection 1051 pekchhuah a ni tawh bawk.

PMUY hnuaiiah hian chhungkaw khawsak harsa LPS connection la nei ve lo te hnenah chhungkuaa hmeichhe kum tling hmingin a thlawna Gas connection pekchhuah thin a ni a, dil tur chuan LPG Distributor ah emaw pmuy website emaw Common Service Centre hnai berah ngaihven theih a ni ang.

<><><>

PANGZAWL

Pangzawl khuaa loneitute chuan tunlai hian lo lamah an thlai chin an seng chho mek a, thlai hrang hrang an thar zingah hmarcha chu hlawhtling taka tharchhuak tam tak an awm a ni.

Pangzawl khua hian hmarcha an thar tam hle a, loneitu chhungkaw tin deuhthaw chuan hmarcha an ching a, an hmarcha chin te sengin hralh turin an sawng bawl mek a, Heng hmarcha te hi hmarcha thau an tih mai niin an phoro a, chu chu vai hovin a hmunah Kg 1, Rs 350 in an lei sak a, tharchhuak tam zingah quintal 4 thlenga thar te pawh an awm a ni.

Hmarcha bakah hian sawhthing pawh engemawzah an thar a, vawiin khan Kg 1 Rs 25 in Company ten an leisak a, Sawhthing chingtute chuan a tira an chawhsa chu leituten tlem tea an leisak avangin chawh tawhsa dah chhiat an nei nual tih an sawi a, a hlawma hralh theih chu an duh ber tih an sawi bawk.



AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.



AGRICULTURE MINISTER

Agriculture Minister Pu PC Vanlalruata'n Mizoram atanga thlai tharchhuah zingah Mizo sawhthing chu an chhuang zual hle tih sawiin, Mizoram sorkar chuan kuminah loneitute hnen atanga sawhthing a leina support price atan cheng cheng vbc 137 chuang a seng tawh a ti.

Vawiina Agriculture & Farmers' Welfare Department buatsaih Aijal Club-a BUYER-SELLER MEET 2025 an hmannaah he thu hi sawiin, Agriculture Minister Pu Vanlalruata chuan nikuma BUYER-SELLER MEET an lo neih tawh chu thlai thar chhuaktu loneitute thawhrimna leh an tharchhuah leisaktute zarah a hlawhtling hle a ti a, kumina BUYER-SELLER MEET an neih leh tur chuan nikum a khum ngei a rin thu a sawi a, Mizorama thar chhuah sawhthing, aieng, Mizo hmarchate leh buhfaita chuan ram chung hmun hrang hranga sumdawna lian tak a thleng tawh tih sawiin Mizoram atanga thlai an tharchhuah zingah Mizo sawhthing chu an chhuang zual hle tih a ti a, kumin chungin Mizoram sorkar chuan loneitute hnen atanga sawhthing a leina support price atan cheng cheng vbc 137 chuang a seng tawh a ti a, tunhnaia New Delhi-a NITI Aayog-in stakeholder inrawnkhawmna a buatsaihah Mizorama sawhthing chingtute tan Mizoram sorkar leh sorkar laipuiin loneitute tan sumdawna tha tak an siam sak zia a lantir tih a sawi a, sorkar chuan loneitute hlawkna leh hamthatna atan engmah tih hreh a nei dawn lo tih sawiin, Mizoram sorkar chuan marketing system tichak lehzual tur leh minimum support price kalpui zel turin hma an la dawn tih a sawi ni.

Mizoram Agricultural Marketing Board -in International Fund for Agricultural Development, leh Mission Organic Mizoram, te thawhpuia an buatsaih BUYER-SELLER MEET 2025 hi vawiin December ni 5 leh naktuk December ni 6 hian Aijal Club-ah neih a ni dawn a, he hunah hian Mizoram hmun hrang hranga loneitute thlai thar leh an kutchhuak te lei theiha phochhuah a ni ang.



INDIA RUSSIA

India leh Russia chuan vawiin khan thawhdunna tur inremna thuthlung pawimawh tak tak an zia. Inremna an ziah zingah hian ram venhimna lamte, sumdawna, eibar zawna, healthcare, academics, sulture leh media lamahte inremna an siam a. Prime Minister Narendra Modia chuan Russia President Vladimir Putin nen thuchhuah intawm an siamah India leh Russia inthianthatna chuan khawvel harsatna thleng mek hmachhawn turin chakna thar a siam dawn tih a sawi a. Vawiina India-Russia Annual Summit vawi 23 ah President Putin nen hian inkawmin Pu Modia chuan ram pahnihten hmabak hun tha an intawm a ti a. India leh Russia te chu firfiaka chetna do turin an tangdun reng tih a sawi a. Firfiaka

chetna chu mihring dikna leh chanvo ti chhetu berah India chuan a ngai tih sawiin khawvel ramte an tanruah a pawimawh takzet tih a sawi bawh a ni.



AIRLINES

Union Ministry of Civil Aviation chuan tunhnaia ramchhunga khualzin thlawhna chungchanga harsatna thleng mek chingfel turin hma a la. Sawrkar laipui chuan khualzin thlawhnate ti khawtlai emaw thulh tawh lova tluang taka an thlawh chhonzawm theih nan theihtawp a chhuah a. Tun hnaiah Indigo airlines ten buaina an tawh avangin khualzin thlawhna thlawh dan a buai nasa hle a ni.

Sawrkar laipui chuan zanin zanlai atang chuan thlawhnate hi a hun pangngaia thlawk chhuak leh tawh turin a beisei a. Hun reiloteah hna pangngai thawh chhonzawm tura beisei an nih thu tarlanign passenger te pawhin an thlawhna thlawh hun sawn anih leh nih lohte airlines te information system ah in lam atanga an lo enfiah theih tura tih a ni a. Thlawhna thlawk tur cancel a awm chuan passenger ten an pawisa chawi a zavaiin an hmulet thei dawn bawh a ni. Hei bakah hian Union ministry of Civil Aviation control room chuan darkar 24 chung thlawhna service dinhmun hi a vil reng dawn tih a tarlang bawh a ni.

